



Tir Yimym

www.tiryimym.in

Regd. No. RNI. NAGAAO/ 2004 / 13113. Postal-NE/RN-717.

e-mail : tiryimym@gmail.com

TAPAK 7

Yangia anidakangma :



Tir Yimym



tir_yimym



tir yimym

TAPAK 8

**Xi-i Victory Day atema
Russia semdangtsü**

**Aryna Sabalenka-i Madrid
Open Title benogo**



VOL. XXII ISSUE NO. 201 (ADOK 201)

DIMAPUR

SANGTENNÜ (TUESDAY)

MONUPII (MAY) 06, 2025

₹ 5.00

MHA-i May 7 nü mock drills agitsü tuyur

New Delhi, May 5, 2025 (Agencies): Ministry of Home Affairs (MHA)-i Hombarnü state aika dang May 7 nü mock drills agitsü tetuyuba agütsüogo.

MHA-i civil defence preparedness atema iba mapa inyaksü ashir aser state sorkartem dang air raid warning sirens agütsütsü aser civilian tem tsükchiri amakdang parnok sasa kümzüksü tesayubatem agütsütsü metetdaksüogo.

State sorkartemi evacuation plans yanglushitsü aser inyaksü, crash blackout measures aser tongtipang plants o installations miimbangtsü tetuyuba agütsüogo.

April 22, 2025 nü Jammu and Kashmir kübok Pahalgam nung kiralongrartemi nisung 26 khasetba sülen India aser Pakistan tsüngda tesentaktep mejungi kümer aliba mapang ka MHA-i iba tetuyuba agütsüogo.

Iba tatalokba atema India-i Pakistan anema lemtet aika agiogo. Iba nung Indus Waters Treaty anena ayuba aser Attari nung land border crossing shibangba dena lir. NDA sorkarisa Pakistani nunger nem visa agütsüba aliba ajak meyipa agiogo aser Pakistan Airlines indang tayimtsütem asoshi Indian airspace shibangogo.

Pakistan-isa India den shishilembaba ajak anenba metetdaksüogo aser Indian airlines atema parnok airspace shibangogo. Tesüiba anogo 10 tsüngda Pakistan forces-i arrtsülen ceasefire alema mapa inyaka arur.

India-i tayang küpzüksü ta bilemba agi Pakistan-i defence preparedness inyaker, border outposts akangshiogo aser missile tests agir. Minister karibo India-i Pakistan yakta amaksü ta ashir.

India nungeri visa medeni linük 58 semdangtettsü

New Delhi, May 5, 2025 (Agencies): Henley Passport Index ajanga 2025 küm India passport ranking jenjang 81-i aluogo aser iba ajanga India sensotemi visa medeni linük aika semdangtettsü.

India nungeri Europe, United States mesüra United Kingdom amala linüktem semdangtsü atema visa nüngdaker saka linük 58 tashi visa medeni semdangtsü akok.

India nungeri visa medeni semdangtetba linüktem rongnung Africa linük aika dena lir. Ano, Oceania nunga Fiji, Micronesia, Palau Islands, Vanuatu semdangtsü akok.

India nungeri visa medeni semdangtsüba linüktem :

Angola, Barbados, Bhutan, Bolivia, British Virgin Islands,

Burundi, Cambodia, Cape Verde Islands, Comoro Islands, Cook Islands, Djibouri, Dominica, Ethiopia, Fiji, Grenada, Guinea-Bissau, Haiti, Indonesia, Iran, Jamaica, Jordan, Kazakhstan, Kenya, Kiribati, Laos, Macao (Special administrative regions of China), Madagascar, Malaysia, Maldives, Marshall Islands, Mauritius, Micronesia, Mongolia, Montserrat, Mozambique, Myanmar, Namibia, Nepal, Niue, Palau Islands, Qatar, Rwanda, Samoa, Senegal, Seychelles, Sierra Leone, Somalia, Sri Lanka, St. Kitts and Nevis, St. Lucia, St. Vincent and the Grenadines, Tanzania, Thailand, Timor-Leste, Trinidad and Tobago, Tuvalu, Vanuatu aser Zimbabwe.

SC-i Biren Singh indang FSL report magizüker

New Delhi, May 5, 2025 (Agencies): Centre sorkari taoba Manipur Chief Minister N Biren Singh indang audio tapes ta ser sealed cover report agütsüba nung Supreme Court-i ashishitep.

Supreme Court-i Hombarnü Centre sorkar dang Central Forensic Science Laboratory (CFSL) dang audio recordings tanaben reprangshitsü aser report tasen ka agütsütsü tetuyuba agütsüogo.

Chief Justice Sanjiv Khanna aser Justice Sanjay Kumar na adenba bench kati tang agütsüba FSL report dak temulung alemtsü mali ta ashi.

Manipur nung kin o kin tsüngda mepetmesü adoka raraba ya Biren Singh-i ajungmesoa inyakba ta audio tapes ajanga kuli

agütsüba shia lir.

CFSL-i audio files tanaben asadangtsü atema Supreme Court-isa Solicitor General Tushar Mehta dang Centre den osang agiteptsü metetdaksü.

SC bench-i Kuki Organisation for Human Rights Trust ajanga benokba PIL angadanger. Kuki nunger telok atema advocate Prashant Bhushan noktaker aser parnoki tapes asadangtsü atema court-supervised Special Investigation Team (SIT) asütsü akhanger.

May 2023 nung Meitei aser Kuki nunger tsüngda rara adokba ta taoba Chief Minister Biren Singh-i ajungmesoa inyakba mapa ka lir ta Kuki Organisation for Human Rights Trust-i ashir.

CTAN aser NNQF-i teyariteper ajak dang pelaba metetdaksür



Dimapur, May 5, 2025

(TYO): Department of Higher Education nung kanga dang tim mesü Assistant Professors aser Librarians 147 regularize asüba anema lungkak aйдang onok den yariteper ajak dang kanga pelar ta Combined Technical Association of Nagaland (CTAN) and aser the Nagaland NET Qualified Forum (NNQF) külem sangdong ka nung ashi.

Iba lungkak aitba sentong ajanga Naga nungeri tang nungibo tim masüba anema longjemer noktaksü ta asüba ochi nung akangshitepogo. Iba putu yagi tim masüba matsüngdang mapudaksütsü. Onoki ochi, tim, aser meranga inyakba tangatetba nung noktaker, ta parnokki ashi.

Ajisüaka asenoki takok nguogo ta ser dangbo malitsüla saka iba ken o tembangba sülen ang tatembang takok lir. Anungji nisung ajaki onok asoshi bilemstsütsü, sarasademtsütsü aser pusema nungitsü mepishia metetdaksür, ta NTAN aser NNQF-isa ashi.

Nenoki arua shilem agiba, ola

adokba aser temulungtetba ajanga onok nem tashi agütsüogo. Temeten, tajungertem shimtsüba aser sorkar mapa nung nisung shimokba ochishia inyaksü atema noktakba nung tashi agütsüogo. Kaketshir teloktem, Nagaland aser tangalen nungi research forums aser CTAN kübok federating units-i yaritepba atema kanga pelar ta parnokki ashi.

Nagaland aser tangalen nungi media nisungtemi anogoshia anibelem aser timtem arema lungkak aitba sentong indang osang prokshiba atema kanga pelar. Nenoki onok den külemi noktakba ajanga onok nem tashi agütsüogo aser tangar nem metetdaksüogo, ta CTAN aser NNQF-isa metetdaksü.

Onok sendentem amentsü atema study halls kiburtemi kanga dang mulungsoa tenla agütsüba aser coaching centres-i onok yariba atema kanga pelar, ta parnokisa shisem.

Maneni, Kezekevi Thehouba züngsemtem, United Traders, All Nagaland Taxi Association, Etu Kwa Toh group aser Hogsrollers ajanga chiyungtsü agüja yaritepba

ateam pelar, ta parnokisa ashi.

Police-i kanga dang aremzüka, mapa shitak inyaka aser akhümtsüba agütsütepa parnok mapa inyakba atema kangasa pelar ta CTAN aser NNQF-i ashi.

Maneni, Kohima Village Youth Organisation (KVYO), Kohima Village Students' Union (KVSU), aser Quick Response Team (QRT) ajanga pusema nungitba aser teyari agütsüba atema pelar ta parnokisa metetdaksü.

Talisa, onok den sen aser tanga teyari agüja yariteper kija, telok aser temeimertem ajak dang kanga pelar. Chiyungtsü, tzü aser senotsü, senzusenbongtsü atema garitem amala mulungsoa tenlaba ajanga onok kanga tashi nguogo ta parnokisa ashi.

Nagaland Baptist Churches Council (NBCC)-in sarasadema nungitba ajanga onok nem tashi agütsü aser tasü itdaksü aser iba atema nenok danga kanga pelar. Maneni, tsüraburtem aser taintemi onok den külemi noktakba aser ajungmesoba atema pelar ta CTAN aser NNQF-isa metetdaksü.

BJP NE in-charge Sambit Patra-i Manipur semdangter

Guwahati, May 5, 2025 (Agencies): Hombarnü BJP North East in-charge Sambit Patra-i Manipur semdangi arua lir aser pai Meitei o Kuki nunger MLA tem den ajuruteptsü.

Patra-i tanü Imphal airport tonga aruba sülen helicopter ka nung Churachandpur-ia apusoa ao. Idakji pai Kuki tanishirtem aser BJP MLA tem den ajuruteptsü. BJP Manipur general secretary K Sarat Kumar-i pa airport nung pelaa agizük.

Manipur nungi MLA 21-i Prime Minister Narendra Modi aser Union Home Minister Amit Shah dangi shidi balala züluba sülen Patra-i Manipur semdangter.

Manipur nung MLA temi

yimjung aser tensa süngjemtsü atema sorkar ka akümtsü shidi nung zülua liasü.

BJP MLA 13, NPP 3, NPF 3 aser independent MLA anati shiditem nung sign süa lir. Prime Minister's Office aser Ministry of Home Affairs ajanga April 30, 2025 nü shiditem agizüka liasü.

Tanü BJP North East in-charge Sambit Patra-i taoba Manipur Chief Minister N Biren Singh den ghona ana shi senden menogo.

Patra-i Churachandpur district nungi meyipa aruli Biren Singh'er Luwangshangbam kidang senden amen. Iba senden nung MLA aika aden ta osang angazüker.

Iba sülen Patra-i Speaker

Thokchom Satyabrata den par kidang ajuruteper aser Hotel Imphal nung Sanasam Premchandra, Karam Shyam, L. Sushindro, Awanboi Newmai, Loshi Dekho aser tangartem den senden ka amen.

Churachandpur nung Patra-i Thanlon BJP MLA Vungzagin Valte den ajuruteper. May 2023 nung kin o kin tsüngda mepetmesü adokba sülen nisung telok kati amakdang Valte kanga mejungi yiru aser pa dang wheelchair ka nung ang senzür.

Churachandpur nungsa Patra-i Churachandpur MLA LM Khaute den ajuruteper aser Zomi Students' Federation nungi memorandum ka agizük.

CHSS Dimapur nung HSLC & HSSLC toppers tushia amshi



Dimapur, Monupii/May 05 (TYO): Tawa Nagaland Board of School Education (NBSE) ajanga sangdongba High School Leaving Certificate (HSLC) aser Higher Secondary School Leaving Certificate (HSSLC) examination 2025 nung Christian Higher Secondary School (CHSS) Dimapur nungi toppers nem tetushi agütsüba sentong ka May 5, 2025 nü Covenant Hall, CHSS nung agia liasü.

Iba sentong ya SMB Chairman Toshi Sangtam-i moatsü, kong toppers den pei tsürabur aser tang Classes 10 & 12 tezüngdak kaketshirtem dena liasü.

Iba kaket reju nungi toppers tem Watitula Imchen (5th Rank HSLC), Mechali Longkumer (8th Rank HSLC), Piyush Gupta (8th Rank HSLC), Tsungrochung Walling (12th Rank HSLC), Rudradeep Bhattacharjee (16th Rank HSLC), Sahil Hussain (18th

Rank HSLC), Benri Odyuo (5th Rank HSSLC Arts), Sneha Saha (9th Rank HSSLC Com), Monowara Begum (10th Rank HSSLC Com) aser Rosalyn Kikon (Subject Topper ITes 99%) alitsü.

Sentong nung tesayur Renbeni Kikon menden liasü, Vice Principal Patricia Zhimomi-i results osang lemsatop aser Principal S. Moatemsu Walling-i tenügsang agütsüba o jembia liasü.

Kohima DC-i COTPA 2003 shidak amshitsü metetdaksür

Dimapur, Monupii/May 05 (TYO): Deputy Commissioner & Chairman, District Level Coordination Committee (DLCC), National Tobacco Control Programme, Kohima B. Henok Buchem, NCS ajanga COTPA 2003 ozüing shidak amshitsü totuyuba ka agütsüogo.

Village councils, municipal/town wards, government departments, educational institutions, commercial establishments aser nüburtem dang Cigarettes and Other Tobacco Products Act (COTPA) 2003 nung shia aliba ama shidak inyaksü metetdaksür, ta Deputy Commissioner, Kohima ajanga sangdong nung ashi.

Government offices,

healthcare facilities, educational institutions, public transport, restaurants aser entertainment venues tem densema nüburtemi amshiba tesem nung mok achitsü khenyongi memelar. Iba ama tesem ajunga nung "No Smoking" ta jangja-jangja zülur ayutsüla, ta sangdong ajanga ashi.

Cigarettes aser danga moko agi yangluba osettem indang direct and indirect advertisement, promotion aser sponsorship khenyongi memelar. Yangji point-of-sale displays, hoardings, promotional events aser danga yimya balala nung moko amshitsü ajungshiba dena lir.

Arishi küm 18 tekübok aliba nisung dang cigarettes aser

danga moko oset ayoktsü khenyongi memelar. Tayoker temi talir indang arishi küm jangjatsüla, ta ashi.

Iba den ano schools, colleges aser universities densema educational institution indang atsi temaba nungi telungzük meters 100 nung cigarettes aser moko agi yangluba danga osettem ayoktsü memelar.

Anungji pei jurisdictions nung COTPA act 2003 ozüing shidak amshitsü ketdangsürtem dang metetdaksür. Aibelenba mesüra iba ozüing amshiba nung timtem ajurur temi District Nodal Officer, District Tobacco Control Cell, Kohima nem osang agütsütsüla, ta DC Kohima sangdong ajangasa ashi.

DCO Mon ajanga Governor's Award 2025 atema metetdaksür

Dimapur, Monupii/May 05 (TYO): District Cultural Officer, Mon ajanga Mon District nung aliba nübur ajunga dang Music, Arts aser Literature nung temelenshi bener arudaktsüba kija, telok

aser lokti tentet dang Governor's Award 2025 atema application meshir, ta sangdong ka nung ashi.

Application ya May 8, 2025 tashinung District Cultural Office, Mon nem

agütsütsüla.

District Level Selection Committee ajanga applications reprangtsü aser temsüa aliba tem state level Selection Committee nem agütsütsü, ta sangdong ajanga ashi.

Advisor Tongpang Ozukum-i Committee senden ayonger

Dimapur, Monupii/May 05 (TYO): Advisor aser Chairperson, Committee on Papers Laid on the Table, Nagaland Legislative Assembly, Tongpang Ozukum-i iba Committee indang senden ka May 12, 2025 anüngdang 11:00

ako nungi tenzüka C. Chingshen Committee Room, Assembly Secretariat, Kohima nung ayongzükogo.

Iba Committee nung züngsem ajak iba senden nung medema arua adentsü ayongzük, ta sangdong ka ajanga ashi.

NU-i aniba research team kati 'Supercapacitors' bushitet

Dimapur, Monupii/May 05 (TYO): Nagaland University-i aniba multi-institute research team ajanga 'Supercapacitors' ta nüngja agütsür next-generation energy storage devices yanglutetogo.

Nüburtemi iba oset nung temulung agütsür, kechiaser akhi mapang nungi amshiba batteries tem dang iba oset nung energy timba rizünga yuteter aser kanga kera charge asür.

Supercapacitor ajanga mapang inyakba nung tongtipang shilem kaji electrodes atema amshiba material ya lir. Ajisiüka electrodes jenjang asakba yong kanga bulua mamshiteter.

India nung clean energy aser libajen nung timtem magütsütsüsa technologies nung tali ranglokba nung iba research ya kanga junga sendaktepa lir. Iba atema parnoki graphene oxide tajemba kumdaksür aminated graphene yanglutsü yimya tasen ka ngutet.

Iba yimya nung sen kanga ajema indoker aser maparen ajunga ya traditional processes dang tekeraba nung renemer. Maneni iba material nung electrochemical properties tajung sayur, anungji iba amala material

yagi energy storage system tajungba kumdaktsütsü aser jenjang tajemba agi renemtsü.

Mezüng lab nung tendangba nung teimla tajung sayuogo aser tang ibai commercial jenjang nung amshitsüsa bushitar.

Iba research ya NU, Visvesvaraya Technological University (VTU), Karnataka aser Nagarjuna College of Engineering and Technology (NCET), Karnataka nungi researchers temi agia liasü.

Parnoki high performance 'functionalized graphene' supercapacitor material adokdaksütsü yimya bushitet.

Prof. Dipak Sinha, Chemistry Department, Nagaland University aser Visvesvaraya Technological University, Karnataka nungi Prof. Dinesh Rangappa nunger ketdangsüba kübok Suraj Kumar, DST-INSPIRE Fellow ajanga iba study ya agia liasü. Iba team nungya NU nungi Priyakshi Bora, VTU nungi Kunal Roy aser NCET nungi Dr. Navya Rani M nungertem lir.

Parnoki bushitetba ya iScience (<https://doi.org/10.1016/j.jisci.2025.112271>) nunga adokogo.

Mokokchung nung Safety-cum-Mock Drill training agi



Dimapur, Monupii/May 05 (TYO): State Disaster Response Force (SDRF) Mokokchung ajanga May 5, 2025 nü Power Grid, 220/132Kv Mokokchung GIS sub-station nung Safety-cum-Mock Drill training ayongzüka liasü.

Iba training ya Power Grid nung inyaker, AMC personnel, drivers, fitters aser security guards atema ayongzük, kong Basic Life Support (BLS), kitsük kirong, menoknok aser lendong balala mapang jenbutsüba yimyatem sayua liasü.

Kiphire nung kitsük-kirong lendong nungi jembutsü training agütsü



Dimapur, Monupii/May 05 (TYO): Kitsük-kirong lendong nungi jenbua alitsü aser awareness agütsütsü nükjidong nung Fire and Emergency Services, Kiphire ajanga Saramati Modern View High School, Kiphire

nung fire evacuation drill and rescue method training ka May 5, 2025 nü agüja liasü.

Kitsük-kirong lendong nungi ajentsü aser kumzüksü yimya tongtipang sayuba training nung kaketshir aser tesayurtemi shilem agia liasü.

Kaketshir aser tesayurtem nem kitsük-kirong lendong mapang amshitetsü yimya aser shisatsü angazükdaksütsü nükjidong nung iba sentong ya ayongzük.

Iba training nung kitsük-kirong lendong ajuruba ama

yimyatem amshia kera aser tim yimya nung lendong aliba tesem nungi ainshitsüba sayua liasü.

Shilem agirtem fire extinguishers amshitsü aser ajungben lendong mapang süngjema inyaksangshitsü

yimyatem sayu.

Iba training ya ajanga awareness agütsüba kisüng masü saka kaketshir aser tesayurtemi kitsük-kirong mapang telangzüba tajung agütsütsü angazükadakja liasü.



May 05, 2025 nü Manekshaw Centre, New Delhi nung sepaitemi Japan Defence Minister Gen Nakatani nem akhüm agütsüdang tangokba noksa nung angur.

India-i kiralongra anema raraba Russia-i pusemtsü: Vladimir Putin

New Delhi, Monupii/May 05 (Agencies): Hombarnü Russia Tir, Vladimir Putin-i phone ajanga Ato kilonser Narendra Modi den jembidang tawa kiralongrartemi Jammu & Kashmir kübok Pahalgam amakba sashia aitsüogo, ta ministry of external affairs (MEA)-i metetdaksü.

MEA otongdar Randhir Jaiswal-i X ajanga, "Tai maket nisung aika asüba atema Tir Putin-i mangyimba osang lemsatepogo aser India-i kiralongra anema raraba Russia-i pusemtsü ta shiogo. Paisa (Putin), aibelenertem aser parnok pusemertemji ozüing matsüngdangi anir arutsüla ta shiogo," ta metetdaksü.

Putin aser Modi napronglai India aser Russia tsüngda tesendaktep tashi itshitsü atema

jembia. Lenir anapronglai tanga onüktem ajanga Russia aser India na tsüngda tesendaktep meraksadaksütsü aser maneni tesendaktep tajungba akümtsü atema inyaksü bangjemogo, ta Jaiwal-isa metetdaksü.

Ato kilonser Modi-ia Putin den 80buba Victory Day salem lemsatep aser taküm küm tatembanglen India semdangtsü jaoka liasü.

World War II mapang Soviet Union (tang Russia)-i Germany madak takok anguba sülen küm 80 ajungba Victory Day anogomong sentong nung adentsü atema Russia-i Ato kilonser Modi jaoka liasü, ajisüaka kiralongrartemi Pahalgam amakba tatalokba ajanga Ato kilonser Modi-i Russia semdangtsü aliba sentongji thinen.

Yaküm-a Modi-i Russia anaben semdangogo. Yaküm Russia nung Modi-i Tir Vladimir Putin den senden amen aser tanabenbuba semdangba mapang BRICS summit nung aden.

Anogo ishika tejaklen external affairs minister S Jaishankar-ia Russia Foreign Minister Sergey Lavrov den phone ajanga jembia liasü.

April 22 nü J&K nung raliwalirtemi kanga sapua semdangba Pahalgam nung kiralongrartemi tebur 26 khaseta liasü. Pahalgam dang ya "Mini Switzerland" taka ajar.

Pahalgam amakba ya Pakistan nung amenoka aliba Lashkar-e-Taiba (LeT) kiralongrar telok nungi jakzüka The Resistance Front (TRF) teloki südi ta bilemer.

MHA-i state tem dang May 7 nü security drill agitsü tuyur

New Delhi, May 05 (Agencies): Hombarnü Ministry of Home Affairs (MHA)-i state aika dang May 7 anogo nung civil defense drills agiang, ta tuyuogo.

Tsükchirtemi amaktsüsa aliba tensa ka nung nüburtem renema lidaktsütsü atema sorkari iba tetuyuba agütsür, ta kasa osang ajanga metetdaksü.

Drill exercise agiba mapang nung 'sirens' ola asadaksütsü; iba mapang nungji kaketshirtem densema nüburtem peisasa kümzüksü atema training agütsütsü.

State tem dang lendong mapang nung nisung aienhidaktsüba, amalitepa inyakba aser lendong atema terenemshiba training agiang ta tuyu.

Joko tesüiba anogo aika Pakistan nunger sepaitemi Line of Control (LoC) nung injang maneni yoker. Yamaji Indian Army temia forward post aika nung injang yokdar.

Kiralongrartemi Pahalgam nung nisung 26 khasetba sülen India-i mangyangtsüa akok, ta bilema Pakistan-i arrtsülen security tashi itshiba den külemi missiles tendangogo.

India-i Pakistan nung yimokba Chenab ayongtzü nokdanger



Jammu, May 05, 2025: Jammu kübok Akhnoor sector nung Chenab ayong nung tzü kanga ajema aliba noksa nung angur.

SC-i May15 nü Waqf (Amendment) Act ken o angadangtsü

New Delhi, May 05 (Agencies): Hombarnü Supreme Court-i, Waqf (Amendment) Act anema benoka aliba temepishiba ken otem Chief Justice of India shima alisang Justice B R Gavai-i aniba bench-i May 15 nü angadangtsü, ta metetdaksü.

Kasa bench nung züngsemtem rongnung Chief Justice Sanjiv Khanna den Justices- Sanjay Kumar aser K V Viswanathan nunger densema lir.

Iba ken o angadanga mapang nung CJI, Sanjay Khanna-i, "Nenoki (Centre) inyaksüsa lenla kar lir, ajisüaka itemji jangjashitsütsü nüngdaker. Ken o angadang tetenzüklen oshidang kecha agütsütsü makok. Iba ken o ya

tekeraba nung angadangtsü," ta metetdaksü.

CJI Khanna May 13 nü CJI menden nungi anisüngzüksü, iba sülen Justice Gavai-i pa melenzüksü.

Khanna-i, "Onoki counter affidavit (Centre-i agütsüba) ji jungjunga mezüngdang. Waqf kiojentem registration dak sendakba nung nenoki onük kar agütsüogo aser mangatettep aliba kar metetdaksüogo, ajisüaka itemji shisadangtsüsa akümtsü," ta ashi.

Waqf Act anema temepishiba ken o pongu benoka lir aser itemji lokteper 'In Re the Waqf (Amendment) Act, 2025' ta ajar. Item ken o rongnung AIMIM Tir aser Hyderabad MP Asaduddin Owaisi-i benokba ken o-a

densema lir.

Lok Sabha nung züngsem 288-i iba Bill pusema vote agütsü aser iba bill anema vote agütsür 232 dang liasü. Rajya Sabha nunga züngsem 128-i iba bill pusema vote agütsü aser züngsem 95-i iba bill anema vote agüja liasü.

Parliament House anaprongla nung iba bill agizüka April 5 nü Tir Droupadi Murmu-ia agizükba sülen taoba ita Centre-i Waqf (Amendment) Act, 2025 sangdonga liasü.

DMK, YSRCP, AIMIM aser Left party temi iba Act anema nokdaker, iba denji külemi melungtet telok kar aser Muslim tentettemia iba Act anema Supreme Court nung ken o benokogo.

New Delhi, May 05 (Agencies): Kiralongrartemi Pahalgam amakba sülen India-i Indus Water Treaty (IWT) tezüngzüktep thinena liasü aser tang India-i Chenab ayong nung Baglihar Dam ajanga ayimba tzü nokdangogo.

India-i maneni Jhelum ayong nung aliba Kishanganga Dam nunga kasaji inyaksü tebilemba lir, ta osang angazüker.

Jammu kübok Tamban nung aliba Baglihar dam aser north Kashmir kübok Kishanganga dam ama hydroelectric dams nungbo India-i mapang apir tzü chiochtsü akok.

1960 küm agiba Indus Waters Treaty tezüngzüktep kübok Indus ayong aser iba ayong nung yimokba ayongtem tzüji India aser Pakistan na tsüngda lemsatepa agia arudar.

Mapang talangka nungi Baglihar Dam dak sendakba nung linük ana tsüngda mangatettep adoka arur, ibayongji tesüiba mapang nunga Pakistan-i World Bank dang tiyongtsüü aita inyaksü mepishia liasü.

Hopta ka shi o lemtepa aruba den külemi hydrological testing agiba sülen India-i Baglihar dam nungi tzü ajema yokba maparen tenzüka liasü, aser ibaji ajanga Pakistan nung yimokba tzü shilem 90 tashi ajema kümogo, ta National Hydroelectric Power

Corporation nungi ketdangser kati metetdaksü.

Kishanganga dam nunga kasaji inyaksü tebilemba lir, ta paisa metetdaksü.

Ano külen tanga osang ka nung, yashi osangbenertem den jembidang Jamiat Ulama-i-Hind tongti lenir, Arshad Madani-i, India-i Pakistan nung yimokba tzüji nokdangtetsü asü, ta ashi.

Madani-i, "Kari tzüji nokdangtetra nokdangdakjang. Item ayong ya küm meyrjang aika ayimer, anungji item ayong tzüji koleni aotsü? Iba mapaji temela masü," ta ashi.

Paisa, "Tesempa indang masü saka temeim indang temzüng benshitsüla. Ni Muslim nunger ka aser iba linük (India) nung kü arrshi piyong alir. Yangi ajungkettsüba mapatem ya iba linük nungjibo mapet," ta ashi.

Indus Waters Treaty tezüngzüktep thinentsüba dak sendakba nung Pakistan Peoples Party Tir aser taoba mapang foreign minister, Bilawal Bhutto Zardari-i, "Modi-i pa kijai Indus Waters Treaty agientsü telemteba agi. Iba tezüngzüktep kübok India-i Indus ayong ya Pakistan meyrong lir ta agizükteta lir. Ni India dang ya shiner- Indus ya onok meyrong aser onok meyrongsa asütsü. Indus nung tzü ayimtsü mesüra parnok indang azü ayimtsü," ta metetdaksüogo.



May 05, 2025 nü Shimba nung BJP züngsem tetsürtemi kiralongrartemi Pahalgam amakba anema longkak aitba noksa nung angur.



TIR YIMYIM YIMOBILEM (EDITORIAL)

DIMAPUR TUESDAY, MAY (MONUPII) 06, 2025

Naga nunger aotsüba lenmang

Nagaland nung lokti tentettem den Goanboratem telongjem dena külem bangjemteper ayongzükba senden amato ka, May 14 nü Agri Expo, Chümoukedima nung Naga yimten nüchiso bushir telok ajak jaoka alitsü sangdongba osang ka angashili, ano iba senden nungji Forum for Naga Reconciliation (FNR) purtembo medentettsü ta metetdaksüba osang jagi nübortem mulungjang nung terata aser tasüngdangba aika enoktsür. Aruya aliba May 14 nü Naga nunger linük tenzük telok ajak aruagi shilem agitsüsa ayongzükba sentong nükjidongji Naga yimten tebilemtsü ya tatem küma telatetba kati arutettsüsa jembitsü ta tayongertemi sangdongba osang nung shia lir. Ajisüaka, tayongertem rongnung FNR teloka densema lir ser nung parnok den masüngdangtep ser parnok telok dena enoksemer senden alitsüba osangji tongtaa lira, ibajibo tebilemtsü akoktsü ayongba senden masü saka senden mesentep dang yongi tebilemtsü talila bendener asütsü. Atangji, Naga yimten tebilemtsü ken o ya FNR teloki dang jembitsü aser parnoki dang ken o koka tembangtettsü ta masü saka FNR telok madenyonga Naga kin ajak longjemer telemtetba tajung ka agitetra, idakji tashi lir aser iba jagi akoktsü. Ajisüaka, tang Naga nunger yimten tia agi, Naga kin ajak longjemer telemtetba tajung ka agitettsüba mapang masü amai ka kümogo, kechiyong Naga nunger kin ajak longjemdak sabang tajung ka maka aser Naga nunger Naga yimten ken o nung kenbang obang medemtsüba India-i Naga nunger nem yimten nüchiso agütsütsüba dang nungi tasakba kümogo. Aji oda, khien khien kuli küpdok senden jakzüker amato Nagaland government-i Naga kin aser Naga nunger lokti tentettem Naga yimten tebilemtsü ken o nung shisalemsateptsü jaokli aser ano khien khien Delhi nung oagi Naga yimten ken o jembitsü aoer amai oa sayuli ta senden nung latetba aser teinyaktetbo kecha maka ser küm metsü dak tali süidagi. Atangji, Nagaland government-ji parnoki ashiba ama, tetsüngda nung o tongdar ka dang aser tang tashi nung Naga yimten nüchiso bushir teloktem o India government na tsüngda kechi ken o sa bener jajar, ashiko, parnokia meshitettsü südi. Iba ama tia ka nung, atangji, tang lokti tentettemi ayongzükba amato karibo pei nübo aser rongsen endoka yimten ken o jembia jajatsü nüngdaker. Ajisüaka, tangatettsü kaji, Naga yimten tebilemtsü ken o yabo telok tulu sentepa jembitsüla ken o masü, Naga kintem tenüng nung telok tila kati tajurutsü purtem mapang agia ajurua jembia aotsü nüngdaker. Iba amaji FNR telokibo inyakba angur, ajisüaka FNR teloka parnok telok tenüng jatetba amaji Naga nunger tenüng nung India den Naga yimten ken o jembitsüba telok masü saka Naga nungertem meputepi aliba putepdaktsütsüba jagi parnoki meranger. Aji oda, Naga nunger o Naga nunger tsükchir kümer azü poka khatapa aliba parnoki anendaktsüogo. Iba jagi asenoki memetetia Naga nunger taküm aika FNR teloki kümzükogo ta bilemdi. Ajisüaka, Naga nunger tia majung FNR teloki putepdaktsütsü merangli, ano taliang meputepba kümli ta FNR telok tenzük dangbo Naga nunger yimten nüchi bushir telok asem-pezü ka dang asüba tangbo metsü-semer ka kümogo. Ibaji kodang bilemdangdir, Naga nungertem ya tangsa tangbo kasa tangatetba kati arua melongjemtettsü amai sayur. Aji oda, Naga nunger yimten lenirtem tebilemba yabo, ashiko, longjemer yimten tebilemtsü akoktsüba ya masü saka tzu menena alidang angu apu ama, Naga nunger melongjem aser meputepi aliba tensa tiajang angu pua achitsü mapang tajungtiba asütsü ta bilemer amai sayur. Aji agi meputepner südi aser ken o a tatem küma mejembiner südi. Ajisüaka, tarutsü lanu putu danga meima, Naga kintem telok tentet balala NTC, CNTC, TPO, ENPO, UNC, Naga Hoho aser FNR dena 'Committee' tilaka tenteter Naga yimten tebilemtsü ken o telemtetba ka dangi arutsü lenmang bushilasang, aji agiang Naga nunger aotsüba lenmang bushitetla. Iba nungji asenoki lenisüba agütsütsü Naga nungertemi imladar südi.

OLEMSABANG

ALIMA TATEMPANG PUTU TSÜNGREM O ATALOKER:

~ T.N. Jamir, Mokokchung

(Yashi adok nungi...)

Tanü Israel tia Zekaria 12:2-3 nung ashir; ni meketa aliba kin ajak dangi ni Yirusalem temesepba marok ka kümdaktsütsü aser Yihuda madaka Yirusalem anema meketpangba danga aji oda alitsü, aser iba anogo nungji nisung ajak asoshi ni Yirusalem lung taret kümdaktsütsü. Shirnoki aji ajungkettsü merangdir parnok sasa kanga yirutsü.

Tamang yimsü ya Abraham mapang nungi azü tokshia tenzük azü tokshia atemtsü. Asenoka azü tokshi maruba agi tamang mainer. Abraham semchir par terana (12) ljepe aluba küm 400 parnok Tsüngremi Abraham dang nangzükba ama tali azükarua rena aodangbo ljepe nungeri tenük merema apusoji Tsüngremi Abraham dang nangzükba limai anir atoktsü Tsüngremer sentong nung Mosa asoba mapang lbri nunger (tetez? par oshiji lbri (Hebrew) o jembiba agi lbri nunger ta aja südi, yamaji Mosa asodang Nile ayong küm ana teküpok tanur tebur chanutem kar taküm pouktsüli, kar nok agi ayipdang inoktsüli ta meyi kwi tepseter alitsü. Ano ljepe nungera Tsüngrempur reshikangshibayong Israel nunger apusoba anepdang Tsüngremi nisung kwi tepseter alitsü. Ano Mosai anir atokdang kasa Abraham semchirtem, Ismail semchirtem, Esau semchirtem, Lot semchirtem, Moab semchir, Amoner semchir aser Abrahami Sara sür tetsür ka agiba Keturai asoba nisung pungo nungi jakzükba item kintem makdoker alitsü Tsüngremi mela. Ano Israel chirtema tashi mangaba yong aika asü, kin karibo noktang item ajakji parnoki kokyonga atok. (Anitet kaket zügang).

Parnokji memejeptokba kin ta züngshi. Parnokji maktoker alitsü Tsüngremi mela. Tetezü Tsüngremi Yakob meim Esau sempa. Ano kodang Hamas-i Israel amakts? atu, Amos ainkari ashiba Ama aser nenok benjongbentsü agi mangyimba kümdaktsütsü, aser nenok ken agi mangyimba ken kümdaktsütsü..." (Amos 8:10) ta ashiba ataloker. Ano iba sülen Zakaria 12:1-2. Nung ashi amaji Yirusalemji temesepba marok ka kümdaktsütsü ta ashi ama alima kin ajak asen Aor dena memesep südi ta ajiteter. Kechiba ta süra shingaia Israel otsü ya tenla kidang jembiba mangur. Anungji tang ya alima ajak mangmangtepba (confusion period) mapang ka nung alir ama ajiteter. Ano Pandemic sülen alima temelenshi tulu aruba asenoki angashiba ama tesüngmangtsü ka melenshiogo. Tsüngrem lartema Tsüngrem Tanela agi sünger ain nung Tsüngrem o jembiba angur; kechiyong ni kidang mener KABA, DABA, MTBA channel ajak repranger aser asen Aor kotaki aotsüpur aika lir, temelenshi rongnung asen Aorsa temelenshiba angur. Kechiyong ni ken ken Bazaari aodang ni asen Aotsür- Aor ya kotak tenyar ama dang angur. Tenla kidang tanela o tarok aika ashir, saka Yisu yakta arur Tanela renemer kotaki aotsü indang, molumi indang jembiba aika mangur. Ano kar dak alaka layman, sayutsünger, counselor aika Laishiba mazünger amai ajiteter, parnoki Laishiba tai ashiba angur. Tawa Aor lanur Theologian kati Eden Tsükiji kong ali shibai shitettsü ta ashi, anungji ni lipok tapu 2ji zügang Eden Tsükiji Eastern Iraq nung lir ta shir yutsü. Ano ni tazüngerter dang ya ajungshir, sen aika masüji kidang kinunger ajak reprangtettsüsa TV nung internet inokdaktsüner aser CBN channel ama Yirusalem downline tanga channel aika inok nung ajungtsü, Tsüngrem o jangrarterter asoshi ya Lai o ataloker. Zekaria 12:3 " Aser iba anogo nungji nisung ajak asoshi ni Yirusalem lung taret kümdaktsütsü. Shirnoki aji ajungkettsü merangdir parnok sasa kanga yirutsü aser alima kin ajak iba anema külemi senteptsü".

(Maneni asüng adok nung...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

'The Chosen; Last Supper' season 5 June 15 nungi sayatsü



'The Chosen; Last Supper'

Monupii/May 05, 2025: "The Chosen: Last Supper" season 5 June 15, 2025 nü United States nung sayatsü, ta Prime Video-i metetdaksüogo.

Iba series nung episodes 8 alitsü aser hopta asem tsüingda shilem asem kümer sayatsü.

Mezüngbuba episode anaji June 15 nungi tenzüka sayatsü, iba sülen episode asem June 22 nungi sayatsü aser tesüsabuba episode asem ji June 29 nungi sayatsü.

Season 5 ya taküm March 28 nü US nung aliba theatres nung sayaa liasü aser April 11 nü alima tesem ajaklen

sayaogo.

June 15 nü season 5 sayatsü lia The Chosen series yanglusang aser director, Dallas Jenkins-i trailer ka sayaogo.

Tesüiba küm asem tsüingda The Chosen theatres nung sayaba ajanga linük 55 nung dollar sen million 140 jungnüa ajangzüktetogo.

Season 5 tetenzüklen shilemji Yisu Khrista alima nung aliba tatembangbuba hopta indang otsü lir. Iba series nung Jonathan Roumie-i Yisu shilem agir.

Jenkins-i, "The Chosen season balala tangokba shia ya kü kinüngtsü, Amanda küna

atema tanela tsütsü tayongzükbä tulu liasü," ta metetdaksü.

"Season shia kü kinüngtsü Amanda-i kü dang yamai ashi, 'Season shia nung aliba otsü nungi tangazüktsü alibatem nungi ana jembua mali,'" ta pai metetdaksü.

"Season 4 mapang nung timtem kanga ajangshiogo. Season four tangokba mapang nung onoki timtem aika ajangshiogo, aser ibaji ajanga onok film yanglurtem aser otsü ashirtem tajungba kümdaksür aser taliba Khrista mesüka kümdaksür," ta pai ashi.

Alima tesem ajaklen tanela asentenshi milak jangrur: Bobby Gruenewald

May 05, 2025: Alima nung Bible app nüngtugutiba YouVersion Bible App tenzüksang aser CEO, Bobby Gruenewald-i, tawa alima tesem ajaklen nisungtemi Laishiba kanga sapua azünger, aser iba ya ajanga Tsüngremi alima tesem ajaklen mapa inyakba kuli sayur, ta ashi.

Easter Sunday nüa alima tesem ajaklen nisung million 18.95-i YouVersion Bible app nung Laishiba zünga liasü. Ibaji yaküm Easter Sunday anogo nung Lai azüngba den medemdangra shilem 12 agi teimba lir.

2008 küm YouVersion Bible app tenzükbä sülen tesüiba küm 16 tashi küm shia iba app nung Lai azünger teimba-teimba dang akümer, aser ibaji ajanga alima tesem ajaklen Tsüngrem O azüngertem kanga renlokba jangjar.

"Tsüngremi mapa inyakba nung onokia shilem tilaka agitetba atema onok pelar. Iba Bible app nung Lai azünger teimba dang akümer," ta pai metetdaksü.

Ano külen Atlantic tesem anatsülen Laishiba-a teimba-teimba dang ayoker. Yaküm US nung Laishiba ayokba shilem 22 agi teimba aküm. Southern

Baptist Convention-ia Laishiba ayokba shilem 30 agi teimba akümba metetdaksüogo.

United Kingdom nunga tesüiba küm pongu tsüingda Laishiba ayokba anasü agi teimba kümogo.

Gruenewald-i, "Iba ya onok indang app masü saka Tsüngremi alima tesem ajaklen Pa O ajanga mapa inyakba lir," ta ashi. "Yangi United States nung aliba college campuses aser alima tesem balala nung tanela asentenshi milak jangrudar," ta pai ashi.

Tawa Gruenewald adenba Arogo nunga tekülem sentong ka agiba sülen nisung 50 shi baptia liasü.

Ano külen alima nung 'The Chosen' film kanga sapua reprangtepba ya Khrista atema tzüraba temaitsü ka lir, ta pai ashi.

"Item ajungaji shisadangra Tsüngremi mapa inyakbaji nai metettsü. Tsüngremi mapa inyakba nung onokia shilem tilaka agitetba atema pelar. Tan putu mapang nung iba Bible app adokba ya kanga tongtibang aser tongtibang hadir ka amai lir," ta pai ashi.

Taoba hopta sayutsünger aser kaketzülur, Jennie Allen-ia alima tesem ajaklen tanela

asentenshi milak jangrur, ta metetdakja liasü.

Allen-i, "Yangi asentenshi lir ta ni bilemer. Asentenshi milak arudar ta masü saka milak jangrudar ta ni bilemer," ta metetdakja liasü.

Tang US tesem balala nung agiba UniteUS college campus movement ya 2023 küm Auburn University nung tenzüka liasü. Iba movement ya Allen-i tenzü.

Allen-i, "Tamang tia, tetsübu-tarendak aser tejashi den azüngmeyak ajanga aikati Tsüngrem bushir. College campus temi oa onoki kaketshirtem dang, 'Nenok tsübur asü? Nenok azüngmeyaka alir asü?' ta asüngdanger. Iba mapang nungji kaketshirtemi phone nung light tsükloker teka mekanger. Ibaji tejashitsüka lir, kechiyong takdang telung nung alir ajaki teka mekanger. Ajisüaka onoki Khrista osangtajung lemsatepba mapang parnoki Khrista nüngdakba nangzüker," ta ashi.

Allen-isa, "Tsüngrem atema tzüraba lir. Pai moatsür aser Pa Tanela yoker. Onoki ibaji Asbury nung [2023 küm] kuli nguogo, iba nungjagi tenzüka asentenshi milak proker," ta ashi.

ANO GO ABEN TSÜNGREM DEN

Tsüngrem teyari agütsür

"Ni kü asoshi Baal tsüngrem dak mapudakba meyirijang tenet anünga lir" (Rom 11:4).

Kuli makai Tsüngremi kodanga metenyar. Tammangtiba anogo nung pai ola tejangja agi jembir. Meyimlaba tia ka nung pai pa asoshi tasü ita jembir adokdaksür. Tzümet süng marudang alima teraksa agi sünger liasü. Iba anema tekümdangtsü ashitsü Noa yok. Pai Kibuba asoshi tasü ita nokdak.

Tanelaren aser jaklaren (moral) ajemrepba tia ka nung nüburtetn alidang John Hus, Martin Luther, aser John Knox tematiba asoshi nokdaksü yok. Kodang Apollo 8 mezüngbuba ita tonger Christmas Eve, 1968 ali tonga alu, parnoki Lipok 1:1-10 zünger yamai ashi, "Apollo 8 nungi, onoki iba den shibanger.... Tsüngremi nenok moajang, ajak alima tajung nung." Anemer liaka United States Postal Service-i Apollo 8 stamp ka Lipok 1:1 nung aliba o, "Tetenzük..." zülur adoktsü. America nunger sen nung parnok motto, "Onoki Tsüngrem dak amanger" ta zülur amshir.

Calendar nung AD jagi, ibai Kibubar küm ta ratettsür. Kodang Yisu tenem nungi alu nütsüngtemi ayimtena pa agizük. Farisi kari Yisu dang, tesayur ne nütsüng arjang ta ashi. Yisui parnok dang langzüa ashi, Ni nenok dang shidi, "Itemi mokorai lira, lungtem jagi ayimtentsü. (Lk. 19:40).

China nung yimsü anema ozüng tasen benokba KCMA-i aitsür

May 05, 2025: Korean Church Media Association (KCMA)-i sangdong ka ajanga China nung May 1, 2025 anogo nung tenzüka tamangba yimsü dak sendakba ozüng tasen benokba atema tebilemtsü akaba lemsatepogo.

KCMA-i, "People's Republic of China nung 'Rules for Implementation of the Provisions on the Administration of Religious Activities of Aliens' ozüng ya China nung missionary tem mapa nokdangtsü nükjidong nung benokba ama reprangteter," ta metetdaksü.

"China-i yimsü dak sendakba mapatem, talisa Khristantem mapa aziokba report aika lir. Ajisüaka tang tasen benokba ozüngtem ya ajanga ano tenokdangbatem teimba akümtsü," ta parnoki metetdaksü.

Association-isa, tamalen China-i tenokdangba 22 benoka liasü, ajisüaka tang tasen benokba tenokdangbatem densemabo ajak senteper tenokdangba 38 kümogo, ta ashi.

"Item tenokdangba tasen benokba sülenbo China nunger anemba, mission mapatem, shisaliok, fundraise aser internet nung yimsü dak sendakba maparen ajak nokdangtsüa akok, ta onoki bilemer," ta

parnokisa metetdaksü.

"Korea nunger missionary tem aika kangshia meindokogo mesüra visa tasen magütsür, ibayongji missionary temi mission wadang toktsür aotsüsa akümer," ta KCMA-i metetdaksü.

April ita tetenzüklen China nung Chinese Communist Party (CCP)-i linük nung missionary tem mapa nokdangtsü atema telemtetba agia liasü aser item tenokdangbaji May 1 nungi mapa küma benokogo.

Iba ozüng kübok bendanger sayutsüngeritem nokdangtsü, pei yimsü lemsatepba nokdangtsü aser sorkar dang nungi temelaba magii yimsü dak sendakba organizations tentetba nokdangtsü.

Chiba nung sorkari melaba Arogo aser Associations ji protestant Three Self Church aser Chinese Catholic Patriotic Association ama telok kar dang lir. Item Arogotem jagi CCP tangatetbatem ajungkettsür aser kentenba, sayutsüngiba aser loktiliba sentongtem nung linük Tir Xi Jinping tenüng ajungkettsür.

Sorkari memelaba Independent house church temibo mapang shia timtem ajurur, linük security anema inyaker ta tai tonglokja lenirtem aser züngsemtem apur.



HEALTH NURSING SCHOOL

Singrijan, Dimapur
Recognized By Indian Nursing Council,
Affiliated to Nagaland Nursing Council, Approved by Govt. of Nagaland



ADMISSION OPEN FOR

1. GENERAL NURSING & MIDWIFERY (GNM)
2. AUXILIARY NURSES & MIDWIVES (ANM)

Forms and application forms can be obtained from the office during office hour.

For more information you can visit our website: www.healthnursingschool.in

Or email us at: healthnursingschooldmv@gmail.com

Contact No. +919366938995, +917005151277,

Israel minister temi Gaza ajunga amokbangtsü sentong agizükogo

Jerusalem, Monupii/May 05 (Agencies): Hombarnü Israel minister temi Gaza ajunga amokbangtsü sentong agizükogo, saka mapang tejangja lateta mali, ta ketdangsür temi ashi.

Ketdangsür temi ashiba agi, iba sentong nungya Palestine nunger meyrirang aika southern Gaza leni yoktsüba densema lir.

Hamas dang pua alirtem chiochtsü aser Israel-i yangluba ceasefire sülen anidakdaksütsü merangba mapang iba sentong ya yanglur alitsü.

March ita tetenzüklen Israel-i Hamas den ceasefire tezüngzüktep raksa aser iba sülen Gaza nung tayimtsü amshia amaker, aser iba ajanga nisung meyrirang aika süogo. Parnoki Gaza tesem tuluka agia tang tashinung Israel kübok Gaza shilem 50 shi lir.

Israel-isa chiyongtsü, totzü aser tzü densema Gaza-i yokba humanitarian aid ajunga nokdanga ita 19 jungnüa raraba nung humanitarian crisis tamajungtiba ajurua lir.

Ketdangsür temi ashiba agi, iba sentong yagi Hamas-i humanitarian aid alimba

nokdangtsü, koba ajanga Hamas-i Gaza nung yimsü asüba tashi itshir ta Israel-i ashir. Ano Hamas targets nung tashi tulu amshia amaktsüba sentong nungya lir ta ashir.

Teyari oset alemba nung Hamas shilem agiba komasür nokdangtsüar Israel ketdangsürtemi mashi, saka teyari agütsüba telok tem den internal memo ka lemsatepba nungbo Gaza nung teyari oset agütsüba ketdangsütsü atema private security companies amshitsü sentong aliba Israel-i United Nations dang shiogo ta shia lir.

Ajisüaka Honibarnü UN-i Israel sentong yaritsü memulunger aser yagji shilem magitsü ta ashir.

Memo ajanga ashiba agi, teyari osettem ya logistics hubs nung agütsütsü, koba private security company temi lapoktsü. Teyari oset lema agütsüba nung Palestine nunger jangjatetsü asoshi 'facial recognition' amshitsü aser pei aliba tesem nung teyari oset meshitsü atema nüburttem nem SMS alerts agütsütsü.

Iba senden nung Israel indang chief of general staff aser Ato Kilonser Benjamin Netanyahu indang cabinet züngsem ana kanga sashia asatop ta ashir.

Far-right National Security Minister Itamar Ben-Gvir aser Minister for Settlement Orit Strook nati Gaza nung aliba Palestine nunger nem teyari oset agütsütsü nüngdak mali ta ashiba sülen Lieutenant General Eyal Zamir-i tena dak asaloktsü ta ashir.

"Nai kechi jembir aji nai mangateter. Nai asenok ajak lendongi yoker. International law lir aser asenoki aji inyaktüsü. Asenoki Strip nung yasa-tzüra metoktsütsü, nenoki jembiba nung lendong lir," ta Zamir-i ashi.

Zamir-i kasaji Netanyahu dang ashi, saka tatem nung cabinet-i pa o senzüka yutsür teyari oset maneni nokdangtsü telemtetba ya agi.

October 7, 2023 nü nungi tenzüka Israel-i Gaza amakba nung nisung 52,567 tepsetogo aser 118,610 yirutsüogo, ta ministry ajanga sangdong ka nung ashi.

Romania election agishiba nung George Simion jenjang tajungba lir

Bucharest, Monupii/May 05 (Agencies): Right-wing nationalist candidate shibai Ukraine nem mitkar nem teyari agütsütsü memulunger aser EU dak tamang makar, pai Romania tir election mezüngbuba round nung kanga junga takok ngutetogo.

George Simion-i mezüngbuba jenjang nguteta vote shilem 40.96 angu aser tanaben May 18 nü agitsü, shiba Bucharest indang liberal mayor dang jenjang kanga agi tajungba lir.

Nicutor Dan-i tera agi Crin Antonescu madak takok angu, shiba governing coalition indang candidate ka lir aser vote shilem 21 tera agi majung angu.

Ita trok tejakdang Romania nung tir election ya tim masüba mapa inyaka aser mangmanga tembang. Iba election nung radical outsider Calin Georgescu-i akok, saka nübuyimba mapang ashikülak mapa inyaka aser Russia-i teka sangshi ta tai tongloksüba yong iba result magi.

Deobarnü polls shibangba sülen Simion-i pa asoshi vote agütsü dang pelaba lemsatop.

"Ibai tasü tait, tamang akaba aser temeim mapa ka lir," ta pai record süa aliba message ka nung ashi.

"Iba election ya candidate ka mesüra dangar ka atema masü, saka tiazü jembiba, senzüka yutsüba, mezüngmeshia amshiaka asen ayak aser temeden asoshi amanga nokdakba tashi alir Romania nunger ajunga asoshi lir," ta Simion-i Hokulbarnü social media X nung ashi.

Simion bhukumer ya talisa bendang lima nung aliba Romania nungertem liasü. Pai Italy, Spain aser Germany nung votes shilem 70 dak tema angu, kong Romania nunger timba 'blue-collar' mapa inyaker.

Arishi küm 38 tain Simion yagi US Tir Donald Trump kanga sakloker aser pai EU ya tashi tait aser sovereign linüktem südaksüner.

Pa tir akumnungbo Romania nung NATO bases aser US sepaitem yudaksüner ta shia liasü.

Ajisüaka NATO ya Ukraine yariba nung shilem tali agir ta ashi.

Taoba küm agiba election nung nisunga aikati Georgescu yari saka Deobarnü agiba election

nung Simion dangi meyip südi ta amanger aser Deobarnü election nung tena külemi vote agütsü.


Voting round tanabuba nung Simion yagi jenjang pezü buba nung aliba taoba ato kilonser Victor Ponta bhukumer tem atsür arutsü akok.

Nationalist Alliance for the Unity of Romanians anisang Simion-i Romania indang arütsü tejen tanaben amshitsü ayongzüka lir aser pa Moldova aser Ukraine linüki maittsü tenokdangba agüja lir.

Romania nung election agir aliba magi kumdaksüba atema February ita US Vice-President JD Vance-i kanga sashia aitsü aser Romania yimtenren anakshitsü, shirnok US den tesendaktep tajung aliba nung metaloka lir. Ajisüaka Georgescu ya tanaben agiba election nung shilem magidaksü.

Ukraine dangi nok-nü aser injang bomb yoktsü atema Romania ya transit route tongtipang ka lir, anungji May 18 nü Simion yagi takok angunungbo ta Europe linüktem, Washington, Kyiv aser Moscow arendaka atar.

MENUNGRA BILEMTETER




Asür T. Shiluchiba Jamir
10.11.1925 to 06.05.2024

"Temeim Oba, Na meshilang limai onok toktsür or küm ka abensa-a oaka ne temeim aser sarasadem onok mulungjang nung teti lir, onoki na kodanga mamateter."

-Kinungtsü, Chirnurtem, Semchirtem, Phunertem
aser Kinungertem

OFFICE OF THE ELECTRICAL WARD YOUTH UNION CHANGTONGYA TOWN TENÜNGSANG AGÜTSÜR



Nagaland Public Service Commission (NPSC) ajanga agiba tatidang Common Educational Services Examination (CESE) 2024 nung Rev. T. Aliba Imchen aser Wt. Imnanaro Tzudir jabaso **Sb. Putikokba Imchen**-i Graduate Teacher (Mathematics) mapa ngutet nung kiyongertemi khonang tetushi agütsür. Tsüngremi ne taküm maneni len aniangma ta sarasademtsür.

Sd/-
SENTISANGLA, AGS

Sd/-
NOKINTEMSU, PRESIDENT

TENÜNGSANG AGÜTSÜR

Sorkar mapa nung nendaka aser bendanga tenzüka nung Nagaland sorkari temaba menden nung ajungketba asoshi oboula Amang semchirtem Mokokchung Unit (Chuchuyimlang) ajak tenüng nung pelaba den külemi tenüingsang aser tetushi agütsür.

1. Shri. C. Alemyanger, Joint Director, Dept. of Agriculture
2. Shri. Talimeren, Deputy Director, Dept. of Horticulture

Asen Teyanglur Tsüngremi nenok kija aser kibongtem maneni moajangma.

Oboula Amang (Chuchuyimlang)
Semchirtem Mokokchung Unit

Ukraine-i drone amshia Moscow amak

Moscow, Monupii/May 5 (Agencies): Bendanger lenirtem dena jaoker military parade tongtibang ka ayongzüka agitsü atema Russia yimtiba Moscow renemba mapang yimti amaktsü atema Ukraine-i yokba drone tem khadangba ketdangsürtemi metetdaksüogo.

Russia indang air defence systems-i Moscow leni yima arua aliba drone pezü khadanga liasü, ta Mayor Sergei Sobyenin-i Hombarnü ashi.

May 9 nü alima rara tanabuba nung takok anguba nüngdem nung ayongzüka agiba sentong tulu atema renemshiba minprongsü atema Ukraine-i iba jenjang agi asütsü ta amanger.

Iba anogomung tenüng nung tir Vladimir Putin-i May 8 nü nungi ghonda 72 ceasefire atema ayongzüko. Ajisüaka Ukraine-i anogo 30 atema

ceasefire benoktsü takhangba agütsüogo, koba teti atema rara anentsü asoshi inyakteptsü nükjidong nung benokba lir. 2022 küm February ita Russia-i Ukraine amak tenzüka sülen linük ana tang tashi rara nung lir. Sobyenin-i Telegram nung post ka nung ashiba agi, lendong nung nisung yiruba mesüra kiojen raksaba osangbo kecha mali.

Ajisüaka drone tem yokba sülen Moscow indang Domodedovo airport nung tayimtsütem senzüsenpong mapang tatsüka atema minpronga liasü. Aviation regulator Rosaviatsia-i ashiba agi, timtem lendong balala nungi jenboa alitsü atema manger mesangwa tsüngda minute 90 shi tayimtsü inyaksangshi anena liasü.

(Maneni tapak 8 nung...)

National Federation Cup nung NWA-i gold 5 aser silver 1 angur



Naga Wrestling demonstration session mapang AITWPF Officials den NWA tir aser Naga nunger wrestler tem tangokba noksa nung angur.

Kohima, Monupii/ May 5 (TYO): All India Traditional Wrestling Pankration Federation (AITWPF) National Federation Cup 2025 nung Nagaland Wrestling Association (NWA) nungi wrestlers temi gold medal 5 aser silver medal 1 nguogo.

NWA Joint Secretary, Kuzhovesa Soho-i sangdong ka ajanga ashiba agi, tir Vivolie Kezo-i anir NWA Team nung wrestler aseme Federation Cup nung Senior Men Belt & Mas Wrestling nung shilem agia liasü. Iba asayamung ya Jaipur, Rajasthan nung May 1 nungi 4

tashi asayaago.

NWA Team nungi takok angurtem:

* Kezhaselu-o Pienyu: Belt aser Mas Wrestling naprongla nung gold; under 100+ Kg

* Venu Vadeo: Belt & Mas Wrestling naprongla nung gold; under -90 Kg

* Nlumrai Hegwang: Belt Wrestling nung gold aser Mas Wrestling nung silver; under -80 Kg.

Temetetsü kaji parnok asemprongla nem wrestling asayatem achaayangdaksü aser Qualified National Referee License agütsü aser

tarutsü nung National Championship tem nunga shilem agitsü temsüa kümogo.

NWA tir Vivolie Kezo-i, lenla balala ajanga team nongita yariba atema Nagaland aser bendanglen nungi wrestling asaya meimertem ajak dang kanga pelaba lemsatepba den tarutsü nunga sarasadem aser lenla balala ajanga asayatem nongita yaritsü mepeshia liasü. Paisa takok ajak tulusang Tsüngrem teyari ajanga ta ashiba den Nagaland sorkar aser nüburtem dang teyari balala atema pelaba lemsatepa liasü.

Season tembangba sülen Trent Alexander-i Liverpool toktsütsü



Monupii/May 5, 2025 (Agencies): England right-back Trent Alexander-Arnold-i, season tatemi club den pa tenangzüktepba yanglur aliba tembangba sülen Liverpool toktsütsü ta ashiba den iba telemteba agitsü ya pa taküm nung telemteba agiba rongnung tasaktiba liasü ta ashi.

Alexander-Arnold, shibai Liverpool puri taoba hopta Premier League akokba nung teyari agüja liasü, pa free transfer ama Real Madrid nung oa adentsü atema sendaktepa aruogo.

Alexander-Arnold, tanur südang nungi Liverpool nungi asaya liasü aser küm 20 sülen pai Anfield toktsütsü telemteba

agiogo. Pa indang contract taküm June 30 nü tembangtsü.

"Mezüngbuba nung iba telemteba agitsü temela masü asü ta shiner aser iba dak sendakba nung aika bilemdangogo. Club den sendakteper küm 20 jungogo aser iba club nung kobika asayaago iba mapang ajak jangradema asayaago aser kü nükjidongtem ajak tongtetogo aser ni ajangzüknübatem ajak ajangzükgogo," ta Alexander-Arnold-i ashiba Liverpool sangdong ka ajanga metetdaksü.

"Küm 20 sülen ni temelenshi ka aginer aser asayar ka aser nisung ka ama ni tajangshiba tasen ka ajangshiner, aser iba

atema tang mapang shitak ta bilemer," ta paisa ashi.

Alexander-Arnold arishi küm trok asüba mapang Liverpool indang Academy nung aden aser iba sülen youth level nung jenjang balala ajanga atuba sülen küm teku tejakdang senior team nungi asaya tenzüka liasü.

Alexander-Arnold-i tang tashi nung Liverpool nungi asaya 352 nung asayaago aser iba mapang goal 23 idaktsüba den asayamung ti tashi kokogo, kong taoba hopta Premier League akokba densema lir.

"Tashitsü aika lir. Ni shinüba tongtibangbaji kanga pelar ta ashitsüba lir. Tetenzük nungi nenoki ni nongita aruogo aser pusemogo," ta Alexander-Arnold-i club pusemertem dang ashi.

"Nenoki ni pusemba, meimba ajak ni jangja lir aser parnokia ni meyipa agütsüba jangjar alitsü ta amanger aser ni akokba tashi club atema inyakba jangjar alitsü imlar," ta pai ashi.

Arishi küm 26 tain asayar ya Mohamed Salah aser Virgil van Dijk na den taküm contract tembangtsüpur asayar asemubba liasü. Salah aser Virgil nabo tenangzüktepba yanglushiogo, saka Alexander-Arnold bo taah kecha magi yoktsüsa akümtsü.

Maddison season tepeyong masayatetsü

Monupii/May 5, 2025 (Agencies): Tottenham midfielder James Maddison, temekok yiruba sülen season nung tatemangbuba hopta asem masayatetsü imlar.

Arishi küm 28 tain asayar yagi Brehostibarnü Europa League semi-final first-leg nung Bodo/Glimt goal 3-1 agi akokba asaya nung goal idaktsü saka yirua liasü.

Asaya tembangba sülenbo head coach Ange Postecoglou-i pa yakta taneptsü angutsü akok ta imla liasü.

Ajisüaka Hokolbar anepdang pa kanga mejungi yiruba jangja aküm aser taoba mapang bilemba dang nungi tamajungba liasü, koba scan balala agiba sülen jangja aküm.

Source balala ajanga Maddison ya temekok nung ligament yiruba tang

asadangdar aser pa koma yiru aji taruba ghonda 48 tsüngda jangjatsü ta shir liasü.

Iba osang ya Tottenham asoshi osang kanga tamajung lir, kechiyong parnok Europa League final atongtsü atema jenjang kanga junga lir aser parnok tanabuba leg atema May 8 nü Norway nung oa asayatsü.

Ajisüaka Maddison ya tanabuba semi-final leg aser iba asaya koka final-i ai yonga masayatetsü. Europa League final ya iba ita Bilbao nung asayatsü.

Deobarnü West Ham den asaya goal 1-1 agütsür tembangba sülen o jembiba mapang Postecoglou-i, ken o Hombarnü jangjatsü ta ashi.

"Pa mejungi yiruogo ta ashitsüa tim masü ama bilemer, saka repranga atati," ta pai ashi.

BENDANGLI OSANG : Tapak 7 nungi...

Ukraine-i drone amshia Moscow amak

Kasa mapang nung Russia nunger ketdangsürtemi ashiba agi, Bryansk tesem nung drone 17 aser Kaluga tesem nung drone pongu khazüka yokogo.

Kremlin-i ashiba agi, Putin-i anogo asem atema ceasefire sangdongba ya nüburtem nem anisüngzükg agütsütsü atema benokba inyakyim ka lir.

Ceasefire benoker aliba mapang military operation tem anena atatsü, ta Russia nungi ketdangsürtemi ashi. Iba sentong nung China tir Xi Jinping, Brazil tir Luiz Inacio Lula da Silva, Serbia tir Aleksandar Vucic aser Slovakia tir Robert Fico nungeria shilem agitsü imlar.

Ajisüaka Russia-i anogo 30 atema ceasefire benoktsübo memulunger, koba United States-ibo agizükogo, shirnoki linük ana tsüngda yimjung atema inyakdar.

Ukraine tir Volodymyr Zelenskyy-i ghonda 72 atema ceasefire benoktsü sangdongba magizüki liasü. Moscow-i ceasefire benoktsü atema memulungba atema US tir Donald Trump-i pa tezü adanger ta ashiba mapang ka nung anogo asem atema ceasefire benoktsüba ya sangdongogo.

Zelenskyy-isa, linük ana tang rara nung lir asünung May 9 nü sentong nung adentsü aruba bendanger lenirtem tekümzükgba kübok toktsütsü ta shia matatetsü, ta ashiba den parnok security atema Russia khuret lir, ta ashi.

"Russia-i anogoshia Ukraine dak akhar saka May 9 nü ceasefire atema asüngdang. Iba ya asemsü lir," ta pai Deobarnü Telegram messaging

app nung zülutsü.

Ghonda 72 atema ceasefire benoktsüba indang sangdongba mapang Putin-i, par linük dak injang khaloktsüra Russia nunger sepaitemia meyiper raratsü ta shia liasü.

May 8 nü nungi ceasefire benoktsü atema benoker liaka Russia-i Ukraine kübok tesem balala maneni makdar.

Hombarnü Ukraine indang air force-i ashiba agi, parnoki manger mesangwa tsüngda Russia-i drone 116 yokba nungi 42 khazüka yokogo.

Russia-i linük yimtiba Kyiv amakba sülen tanur ana densema nisung 11 yiruogo, ta Kyiv city military administration tekolakba Timur Tkachenko-i social media nung sangdong ka ajanga metetdaksü.

Central Ukraine nung Cherkasy tesema makogo. Emergency services sangdong ka ajanga ashiba agi, nisung ka yiru aser nisung aliba kitem aser civil infrastructure tem raksa liasü.

Kasa mapang nung blogger temi Hombarnü sangdong ka ajanga ashiba agi, Ukraine nunger sepaitemi Russia kübok Kursk tesem makogo, koba parnoki tesem karbo ita ishika atsünger liasü, saka taoba ita Russia military-i meyipa agiogo.

Osang balala ajanga ashiba agi, missile khalokja Ukraine nunger sepaitemi arrtsü adena iba tesem yagi ia liasü.

Iba dak sendakba nung Russia aser Ukraine napronglai tang tashi osang kecha agüja mali, ajisüaka Russia nunger war bloggers temi Ukraine nunger sepaitemi tesem ana nung arrtsü adena aitsü merangba indang map tem sayuogo.

BILEMDANGANG

"Na nü sempet kibur masü saka achaayanger ka dang lir."